

Uunga siunnersuut: Sanaartornermi neqerooruteqartitsisarneq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq

(Suliariumannittussarsiuussisarnermut maalaaruteqartarneq pillugu aalajangersakkat allanngortinneqarnerat)

(Ineqarnermut Attaveqaqatigiinnermullu Naalakkersuisoq)

Saqqummiussineq

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Ataatsimiinnermi matumani Inatsisartut Pisortat Pisiortortarneranni Neqerooruteqartitsinermi Maalaaruteqartarfik pillugu Inatsisartut inatsisissaattut siunnersuut suliaaraat.

Illuliortiternermi sanaartornermilu Neqerooruteqartitsisarnermi Maalaaruteqartarfik pioreerpoq. Neqerooruteqartitsisarnermi Maalaaruteqartarfik taanna illuliortiternermi sanaartornermilu neqerooruteqartitsisarneq pillugu Inatsisartut inatsisaat, naatumik oqaatigalugu neqerooruteqartarnermut inatsit naapertorlugu pilersinneqarsimavoq.

Taamaattumik Naalakkersuisut siunnersuutigaat, neqerooruteqartarnermut inatsimmi maalaaruteqarsinnaanermut aalajangersakkat neqerooruteqartarnermut inatsimmit peerneqassasut. Tassunga taarsiullugu illuliortiternermi sanaartornermilu suliariumannittussarsiuussisarnerit il.il. pillugit maalaarutit Pisortat Pisiortortarneranni Neqerooruteqartitsinermi Maalaaruteqartarfik pillugu Inatsisartut inatsisaat nutaaq aqutigalugu maleruagassiuunneqassapput.

Pissutsit taakku tunngavigalugit inatsisissatut siunnersuut manna Naalakkersuisut saqqummiuppaat.

Inatsisissatut siunnersuutip kingunerisaanik illuliortiternermi sanaartornermilu suliariumannittussarsiuussinerit pillugit maalaarutit Neqerooruteqartitsisarnermut Maalaaruteqartarfimmit, atorunnaarsinneqartussamit suliarineqartarunnaassapput. Tamatumunnga taarsiullugu maalaarutit Pisortat Pisiortortarneranni Neqerooruteqartitsinermi Maalaaruteqartarfimmi nutaami suliarineqartalissapput.

Aamma inatsisissatut siunnersuutip kingunerisaanik Pisortat Pisiortortarneranni Neqerooruteqartitsinermi Maalaaruteqartarfiup suliassaqarfii annertusissapput. Taamaalilluni suliat assigiinngitsut ataatsimut sunniutissaannik, siunissami maalaaruteqartarfimmi piginnaaneqarfinnik ineriartortitsinermit nukittorsaasussanik angusaqartoqassaaq.

Erseqqissaatigineqassaaq, neqerooruteqartarnermut inatsimmi maalaaruteqartarnermut aalajangersakkat inatsisissatut siunnersuut manna aqutigalugu peerneqaraluartut, illuliortiternermi sanaartornermilu maalaaruteqarsinnaaneq allanngortinneqarani atuutsinneqartussaammat.

Taamatut oqaaseqaateqarlunga immikkoortoq Inatsisartuni suliassanngorlugu Naalakkersuisut sinnerlugit tunniuppara.